

## Warga emas terima bantuan pemasangan bekalan elektrik percuma

TUMPAT - Keperitan hidup seorang warga emas yang menjalani kehidupan tanpa bekalan elektrik sejak setahun lalu mendapat perhatian pelajar Politeknik Sultan Salahuddin Abdul Aziz Shah, Shah Alam sempena program Kesukarelawan YES Politeknik Peduli Komuniti Pasca Banjir 2017.

Kerja-kerja pemasangan pendawaian elektrik secara percuma di rumah Ramli Ab Rahman, 64, di Kampung Simpangan adalah khidmat sosial yang disertai 60 pelajar.

Pegawai Sukarelawan Politeknik Sultan Salahuddin Abdul Aziz Shah, Nasarudin Zainal Abidin berkata, program itu diadakan bagi membantu penduduk yang terjejas

banjir apabila menyasarkan 20 rumah untuk dibaikpulih pendawaian atau pendawaian elektrik baharu.

"Sumbangan bernilai RM10,000 itu hasil kutipan RM1 daripada setiap pelajar kami.

"Selain pendawaian elektrik, kita juga menyumbangkan peralatan sekolah kepada pelajar terjejas banjir," katanya.

Program bermula sejak 21 Januari dan berakhir 24 Januari turut melibatkan baik pulih pendawaian elektrik di madrasah, tadika dan sekolah oleh pelajar jurusan Diploma Kejuruteraan Elektrik yang turut terlibat sebagai sukarelawan YES Politeknik.

Program itu turut disertai Sukarelawan Polytechnic Emergency Response Team,

Sukarelawan Unit Beruniform, Sukarelawan Kemahiran dan Teknikal, Sukarelawan Khidmat Komuniti dan Kolaborasi serta Sukarelawan Rundingcara dan Pendidikan.

Hadir sama, Adun Pengkalan Kubor, Mat Razi Mat Ali dan Pengarah Politeknik Sultan Salahuddin Abdul Aziz Shah, Kolonel Bersekutu (PA) Tajuddin Abdul Rashid.

Sementara itu, Ramli berkata, dia bersyukur di atas keprihatinan pihak Politeknik yang merealisasikan impiannya untuk mempunyai bekalan elektrik di rumah yang baharu dibina setahun lalu.

Rumah Ramli dibina melalui peruntukkan khas Perdana Menteri dan sumbangan Mat Razi bernilai RM15,000.



Tajuddin (kiri) bersama Mat Razi (kanan) menyerahkan sumbangan kipas kepada Ramli (tengah).